



(Da san.) Martin Candinas, Andrea Caroni, Maja Riniker ed Andreas Gabriel taidian il pled dal secretari general da la Lia Rumantscha Markus Solinger.

FOTOS LIA RUMANTSCHA/MONIKA FLÜCKIGER



Martin Candinas, president da la grupp parlamentara «lingua e cultura rumantscha» era mesemna saira en l'element: qua in pled rumantsch e là far reclama per il rumantsch.



Tranter ils plects uffizials e las baterladas rumantschas hai era dà musica da Dario Hess.

## Lobing tranter capuns e schuppa

Mesemna saira è radund 70 simpatisantas e simpatisants dal rumantsch sa chattads en la Chasa federala ad in apert. Envidà ha la grupp parlamentara «lingua e cultura rumantscha», presidiada da Martin Candinas. Tranter capuns, vin alv e schuppa da giutà èsi ì per la realità rumantscha.

OLIVIA PORTMANN-MOSCA/FMR

«La finimira da questa occurrenza è da far pli visibel e palpabel nossa realità rumantscha a noss collegas en il parlament», respunda il cusseglier naziunal Martin Candinas a la dumonda or da tge scopo ch'el haja envidà a questa saira. Per suttastritgar la relevanza dal rumantsch ha la saira cumenzà cun in act simbolic: Martin Candinas sco president da la grupp parlamentara lingua e cultura rumantscha ha surdà ina clavina rumantscha a la nova presidenta dal Cussegl naziunal Maja Riniker ed ad Andrea Caroni, il nov president dal Cussegl dals chantuns. Omadus han engrazià sco ch'i tutga era cun in pèr plects rumantschs (guarda foto front). Or dal mund rumantsch eran da la partida tut las persunas da num e da pum: da l'elita intellectuala, sur directurs dad uffizis federalis e chantunals fin tar politichers chantunals e persunas da l'economia – e natiralmain betg dad emblidar Rumantschas e Rumantschs che lavuran cun e per la lingua.

### Gust dal buffet

E bunamain la mitad da quest public illuster eran parlamentarias e parlamentaris che han ina tscherta simpatia per il rumantsch. Tuttina or da tge partida e tge chombra ch'ils parlamentaris en vegnids, dad ina chausa han tutt gi gust: il buffet cun ils products offrìs dals parcs nativals dal Grischun. Tranter capuns, schuppa da giutta ed in bun toc chaschiel hai dà in pèr bunas baterladas. Era sch' il cusseglier naziunal Martin Candinas conceda ch'i dovria mintga giada da nov in effort per manar la saira ad in success, capitia be insatge interessant, sche las represchentantas ed il represchentants rumantschs entrian activamain en discurs cun las parlamentarias ed ils parlamentaris tudests, franzos e talians. Da quei

«L'intent da questa saira è da far attent als basegns politics actuals che nus avain e sa drizza natiralmain era tenor l'agenda politica.»

Andreas Gabriel, vicesecretari general da la Lia Rumantscha

resultian ils buns contacts e contribueschia la finala a la buna participaziun dal parlament a la saira rumantscha.

### Ina da las pli grondas gruppas

Cuntent cun la saira e la cifra dals giasts preschents sa mussa er Andreas Gabriel, vicesecretari general e manader dals affars publics da la Lia Rumantscha. Tranter duas buccadas ha el, ch'è medemamain il responsabel per il secretariat da la grupp parlamentara lingua e cultura rumantscha, temp da declarer duas, trais chaussas. «Cun radund 80 commembras e commembers tutga questa grupp tar ina da las grondas en il parlament, quai mussa ch' il rumantsch ha ina tscherta simpatia.» E simpatisas possia la lingua rumantscha en mintgas cas duvrar, declera el.

Dentant che la Confederaziun discurra anc adina gugent be da las trais linguas uffizialas – il rumantsch vegn numnà sco lingua uffiziala sulettamain en contact cun la populaziun rumantscha – dovri tut l'attenziun pussaivla en il parlament per mussar ch' il rumantsch è ina lingua agila, viventa che exista en il mintgadi dad ina massa glieud. E questa glieud haja ils medems basegns linguistics sco auters era, di Andreas Gabriel. «L'intent da questa saira è da far attent als basegns politics actuals che nus avain e sa drizza natiralmain era tenor l'agenda politica. Quai era quest onn la missiva da cultura per ils onns 2025–2028», declera il vicesecretari general da la Lia Rumantscha.

### Digitalisaziun – era realità rumantscha

«Dasper ils plects uffizials da nossas duas co-presidentas Urezza Famos e Gianna Luzio ha Markus Solinger, noss secretari general, era declerà nossa strategia per la digitalisaziun», explitga Andreas Gabriel. Cler, ch' il parlamentaris preschents a l'apert sajan betg fatschentads actualmain cun questa dumonda, conceda Andreas Gabriel. «Quella tematica pertutga pli fitg las Rumantschas ed ils Rumantschas en lur mintgadi e na figurescha betg concretamain sin l'agenda politica dal parlament federal», declera el.

Ma tuttina pudess la digitalisaziun rumantscha anc dar da pensar ad in u l'auter, di il vicesecretari da la Lia Rumantscha vinavant: «Mintgin e mintgina survegn suenter l'apert ina tastgetta cun giutta ed in recept, translata dad in program da translatar. Ed il pli tard lura sentan er il parlamentaris dad autras linguas, che tut questas empernaivladads cun instruments linguistics en l'internet n'èn insumma betg gratuitas per il rumantsch.»

## GRISCHUN

### La Repower cumpra enavos l'ovra Morteratsch



La Repower è da nov en possess da tut las aczias da l'ovra electrica Morteratsch a Puntraschigna.

FOTO REPOWER

L'ovra electrica Morteratsch a Puntraschigna è puspè cumpletamain en ils mauns da la Repower. Il concern d'energia grischun ha cumprà enavos la cumpart da l'acziunaria da maiortad da fin qua, la Reichmuth Infrastructure. Cun cumprà enavos la cumpart veglian ins bajegiar ora vinavant il portfolio cun implants d'energia regenerabla. Quai scriva l'interpresa Repower en ina comunicaziun a las medias da la gievgia. L'onn 2016 avevan Repower e Reichmuth Infrastructure fundà ensemen ina societad acziunaria e lura renovà ed engrondì l'ovra electrica Morteratsch ch'è ina da las pli veglias da la Svizra. (cdm/rtr/fmr)

## CUIRA

### Il Chantun sustegna il project Cuira Vest



La nova staziun Cuira Vest duai vegnir in center per il traffic public. Il Chantun ha approvà 4,2 milliuns francs per il project.

VISUALISAZIUN DVA OFFICE FOR VISUALIZATION IN ARCHITECTURE

Il chantun Grischun sustegna l'engrandiment da la staziun da viafier Cuira Vest cun ina contribuziun da 4,2 milliuns francs. Quai ha la regenza grischuna communitgà la gievgia. En connex cun il svilup dal quartier vegn la fermada da la Viafier retica renovada ad in center per il traffic public. Dasper novs indrizz da binaris ed ina nova punt vegn costruìda ina nova piazza da la staziun cun ina staziun da bus e d'autos da posta. Ils custs totals per il project muntan a radund 68 milliuns francs. (cdm/rtr/fmr)

## GRISCHUN

### La Viafier retica quinta cun in gudogn



La Viafier retica quinta per quest onn cun in gudogn da 13 milliuns francs. Surtut il segment dal traffic da persunas è creschi.

FOTO ANDY METTLER

A la conferenza da medias da la Viafier retica (VR) da la fin da l'onn han il president dal cussegl administrativ Mario Cavigelli ed il directur Renato Fasciati preschents las cifras da quest onn e referi davart il 2025 la gievgia passada, sco che la viafier ha scrit en ina comunicaziun. Per quest onn quinta la VR cun in gudogn da var 13 milliuns francs. Las activitads èn creschidas en tut ils segments da traffic, surtut en il traffic da persunas. Per quest onn da gestiun quinta la Retic cun in retgav da 130 milliuns francs. Quai è in nov record e correspunda ad in plus da 30% be en dus onns. Sper il traffic da persunas è era la svieuta dal transport d'autos tras il Vereina ed il traffic da martganzia sa sviluppada a moda positiva. Per l'onn 2025 duain las construcziuns da las staziuns da Glion, Cuira Vest e Versomi e dals tunnels Toua, Versasca e da Brail I e II avanzar. Plinavant po la VR inaugurar il nov edifiz da biro dal sector material rullant a Landquart. (cdm/rtr/fmr)